

大乘阿毗達磨雜集論述記卷第二十

唐京兆大慈恩寺沙門窺基撰

如世尊說有情業異熟不可思議如是經意非一切
種皆不可思議云何業異熟不可思議云何可思議
謂諸善業於人天趣得可愛異熟是可思議諸不善
業墮三惡趣得不愛異熟是可思議由善惡業往善
惡趣感得可愛不可愛異熟世閒智者能思議故由
此能引發正見等功德故卽由此業感諸有情自身
異熟等種種差別不可思議謂內身等異熟有形色
等無量差別難可思議除一切智不能思議強思議

者發狂等過故復次卽善不善業處差別事差別因
 差別異熟差別品類差別等皆不可思議由卽此業
 處差別等無量無邊難可思議故處者謂住如是處
 造如是業或於城邑或於村落如是等事者謂所依
 事或有情數或非有情數因者謂善不善根如其所
 應異熟者謂異熟內身品類者謂種種差別無量品
 類又有種種外事差別能感業用不可思議由何等
 業感棘刺等鋒鋌鈷利如是等類墮在世間不思議
 攝思議世間佛所制故又末尼珠藥草呪術相應業
 用不可思議末尼相應業者謂月愛珠等能出水等

業用難思藥相應業者謂執持此藥藏隱形等呪相
 應業者謂誦此呪便不燒等術相應業者謂由彼彼
 術故治熱病等。

如世尊說有情業異熟不思議下業中大文第三
 明可思議不可思議等業於中有二初解世間後
 解出世間世間中有三一解業異熟果二解外增
 上果三解末尼等世事。

初解業異熟中有二初釋經業異熟不可思議後
 處等不可思議初中復二初舉經後正釋。

又諸觀行者威德業用不可思議云何彼心威德力

故能動大地升虛空等。又諸菩薩自在業用不可思議。所謂命自在故。心自在故。財自在故。業自在故。生自在故。勝解自在故。願自在故。神通自在故。智自在故。法自在故。諸大菩薩由如是等自在力。故所作業用不可思議。謂諸菩薩由命自在力。持諸壽行。隨所欲樂。爾所時住。由心自在力。隨其所樂。於三摩地入出自在。由勝解自在力。轉大地等爲水火等。勝解自在。由願自在力。隨其所樂。能引無數自利利他圓滿大願。由神通自在力。爲欲攝化無量有情。顯示種種神通變現。由智自在力。於諸法義。訓釋言詞。無滯辯

說圓滿究竟。由法自在力。以無量種名。句。文。身。建立素怛纜等。無上教法。隨其所應。乃至一切有情。於一時間。能令彼心。皆大歡喜。又一切佛所作諸佛。應所作事業。用不可思議。云何如來。到於究竟。無功用處。證得清淨一味法界。諸佛世尊之所應作。利益安樂。諸有情事。隨時如應。皆能成立。如是諸佛及佛境界。不可思議。

出世間中有三。初明二乘等十八變次明菩薩等十自在。後明佛所作等。

十自在以五門分別。一出體。既以六度爲因。準依

無性第九并以後得智爲性。彼釋智自在云。謂隨
所有種種言音現在前故。故知唯後得。若準天親
第九釋智自在云。謂通了知一切爾燄名智自在。
爾燄卽通真如故。此論又云。由智自在力於諸法
義等圓滿究竟。既於義究竟。故準二論可通正智。
餘九事慧。此一通事理。二慧。無性依隨欲而說法
故。唯取辭無礙解智爲智自在。天親依要達境遣
而方空。故取二智爲智自在。此論依成四礙解後
方說法。亦通二智。理不相違。此通事出體。其別出
體。其命財業生通法六。說以後智爲性。其心一種。

依天親論。彼謂於生死時無染汙。唯以心爲體。不
被染故。此論唯以定爲體。於三摩地入出自在故。
無性通以心定二法爲體。故彼論云。謂於生死無
染卽心也。又隨意樂能正爲他。引攝眾具於中。自
在運轉。其心卽心卽定也。或無性意亦唯取心。唯
此論取定合二爲體。其勝解如名爲體。願以欲解
二爲體。智自在者。如通出體。一釋名者。命財業生
法。五俱說爲名。依主釋。餘五持業。若取智爲體。唯
通智二種持業。餘八依主。三辨相。此論解智勝解
神通法四種。與諸論不差。心自在者。此論據定能

持心從所依為名。天親無性。心體不染。財自在者。引攝眾具資生什物。天親云於食等十種眾具自在。業自在者。謂於諸業得大自在。唯作善業。非惡無記。及於其中勸他作故。天親云業生二種。謂此能攝彼能生因及所生果故。由身語業自在而轉。隨所欲生業現前故。生自在者。隨欲往諸趣生故。唯業一種二類不同。一天親之論。乃說菩薩更作業。此意乃非說異熟因。但由作漏無漏業故。不為生死業煩惱所拘。或二。正由佛唯作無漏善業。業者佛之作用。以說財生與無性不別。唯願自在。天

親無性。皆云由昔精進。隨所作究竟。故於今時所願皆得。此論乃以大願引願。謂彼二論依願遂心。此論據願遂願。願遂願。故說皆遂心。遂心者由願遂願故。又彼二依佛願自在。此說菩薩故。不相違。唯智自在。三論不同。如出體中已辨其相。第四明因。初三施因。法無畏財。施次第配。次二戒因。後二智因。中三如名攝論第九說。第五問答分別。問何故攝論說佛具十自在。何故此中說菩薩得彼約圓成。此說分得。若據少分。初地即得。若據彼彼增隨地亦差別。初地雖得。未名自在。義少分得。四相

業智自在是何所攝。又何故說第八地得此唯二
 名非法身起自門故。問。何故唯說十自在。十地論
 云。治十怖畏故。命對死畏。心對煩惱畏。財對貧窮
 畏。生對惡道畏。願對求不得畏。勝解治謗法畏。此
勘之神通對追求時縛畏。智治處眾畏。法治疑畏。
 又五相故。六度三自在。謂器眾。正覺。正知自在。又
 五無量與此相攝。并如十地論問十地中幾有漏
 無漏。問曰。十自在依何地。有如何修習。幾自利利
 他。報地具幾。一一應通。智自在中法義訓詞。卽四
 無礙解也。

復次。如是集諦總有四種行相。所謂因相。集相。生相。
 緣相。因相云。何謂能引發後有習氣。因是名因相。由
 業煩惱是能引發後有習氣。因故。集相云。何謂彼彼
 有情所集習氣於彼彼有情類為等起。因是名集相。
 由諸有情所集習氣於人天等有情類中能為相似
 形貌種類平等起。因故。生相云。何謂各別內身無量
 品類差別。生因是名生相。是諸有情各別內身相續
 決定趣生地等所有一切品類差別。乃至有頂生因
 故。緣相云。何謂諸有情別別得捨。因是名緣相。能令
 有情得未曾得自體。捨已曾得自體。故。如是名為集

諦體相。

集諦何故說四行。五十六治四種愛故。謂我常樂淨。初二別治。後二通治。

云何滅諦。謂由相故。甚深故。世俗故。勝義故。不圓滿故。圓滿故。無莊嚴故。有莊嚴故。有餘故。無餘故。最勝故。差別故。分別滅諦。

滅諦中分六。一辨體。二明深。三假實。四因果。五勝劣。六根本。

相者。謂真如。聖道。煩惱不生。若滅。依若能滅。若滅性。是滅諦相。如世尊說。眼耳及與鼻舌身。及與意於此。

處名色究竟滅無餘。又說是故。次今當觀。是處所謂。此處眼究竟滅。遠離色想。乃至意究竟滅。遠離法想。由此道理。顯示所緣真如。境上有漏法滅。是滅諦相。攝異門分及本地思慧地解名色滅無餘。即通三依因十七釋別名。

甚深者。謂彼諸行究竟寂滅。如是寂滅。望彼諸行。不可說異不異。亦異亦不異。非異非不異。所以者何。若彼諸行究竟寂滅。如是寂滅。與彼諸行。可說異者。應與諸行不相繫屬。條然異體。若不異者。應是染相。由此道理。非俱非不俱。何以故。無戲論故。於此義中。若

生戲論非正思議非道非如亦非善巧方便思故如
 世尊說此六觸處盡離欲滅寂靜沒等若謂有異無
 異亦有異亦無異非有異非無異者於無戲論便生
 戲論乃至有六處可有諸戲論六處既滅絕諸戲論
 即是涅槃若於如是絕諸戲論寂滅涅槃不正思議
 是名戲論於應異思議乃異思議故云何應異思議
 謂上妙離等種種思議。

甚深中勘六十八等執異耶增執過不異耶分別
 自相過互俱句雜亂過俱非損減過於中文有二
 初出體後如是下解釋中分三初總顯非四句次

所以者何下釋後如世尊說引證。

第二釋中初釋師解後本論解。

世俗者謂以世間道摧伏種子所得滅是故世尊別
 名說為彼分涅槃勝義者謂以聖慧永拔種子所得
 滅不圓滿者謂諸有學或預流果攝或一來果攝或
 不還果攝等所有滅圓滿者謂諸無學阿羅漢果攝
 等所有滅無莊嚴者謂慧解脫阿羅漢所有滅無三
 明等最勝功德所莊嚴故有莊嚴者謂俱分解脫三
 明六通阿羅漢等所有滅有無量種最勝功德所莊
 嚴故有餘者謂有餘依滅無餘者謂無餘依滅最勝

者謂佛菩薩無任涅槃攝所有滅以常安住一切有情利樂事故。差別者謂無餘永斷永出永吐盡離欲滅寂靜沒等。

差別中有二。初舉經後別釋。

何故名無餘永斷由餘句故。謂無餘永斷是標句。餘是釋句。是故說言由餘句故。由後別句釋此總故。纏及隨眠皆悉永斷故名無餘永斷。

別釋中有二。初釋標句後釋別句。

何故名永出永出諸纏故此依斷諸纏說謂已生者皆遠離故。何故名永吐永吐隨眠故此依斷隨眠說

謂除根本永不生故。如是諸滅由見修道對治別故。建立二種盡及離欲故。次問言何故名盡。見道對治得離繫故煩惱聚中餘少分故亦名為盡。何故名離欲。修道對治得離繫故由彼修道離諸地欲漸次所顯故名離欲。由有如是俱離繫故當來苦滅故。次問言何故名滅。當來彼果苦不生故能成未來苦不生法故名為滅。又於現法憂惱寂靜故。次問言何故名寂靜。於現法中彼果心苦永不生故。何故名沒餘所。有事永滅沒故。宿業煩惱所感諸蘊自然滅盡故名為沒。由如是等別句釋前無餘永滅總句。

別句中分三初七依所滅辨名差別。

何故此滅復名無為離三相故。生滅住異三有為相
 究竟相違故名無為。何故此滅復名難見。超過肉眼
 天眼境故。唯聖慧眼所行境界故名難見。何故此滅
 復名不轉。永離諸趣差別轉故。離那落迦等往來流
 轉恆常安住故名不轉。何故此滅名不卑屈。離三愛
 故。永離欲色無色三愛於諸有中無所卑屈故名不
 卑屈。何故此滅復名甘露。離蘊魔故。永離一切死所
 依蘊故名甘露。何故此滅復名無漏。永離一切煩惱
 魔故。何故此滅復名舍宅。無罪喜樂所依事故。解脫

喜樂所依止故名舍宅。何故此滅復名洲渚。三界隔
 絕故。於生死大海挺出高原故。譬洲渚。何故此滅復
 名弘濟。能遮一切大苦災橫故。證得此滅。生老病等
 諸苦災橫永遠離故。何故此滅復名歸依。無有虛妄
 意樂。加行所依處故。由於彼滅所發意樂及正加行
 無虛妄性所依處故。所依止義是歸依義。何故此滅
 名勝歸趣。能為歸趣一切最勝聖性所依處故。由此
 寂滅能為歸趣最勝聖性所依止處。是阿羅漢證得
 加行所緣境故。何故此滅復名不死。永離生故。諸無
 生者必不死故。何故此滅名無熱惱。永離一切煩惱

熱故永離一切求不得苦大熱惱故何故此滅名無
 熾然永離一切愁歎憂苦諸惱亂故一切愁等熾然
 永息極清涼故名無熾然何故此滅復名安隱離怖
 畏住所依處故無老病死等一切怖畏聖住所依故
 名安隱何故此滅復名清涼諸利益事所依處故一
 切清涼善法所依故名清涼何故此滅復名樂事第
 一義樂事故出世間樂所依事故名樂事何故此滅
 名趣吉祥為證得彼易修加行所依處故為證涅槃
 易修加行所緣境故何故此滅復名無病永離一切
 障礙病故離煩惱等諸障礙病故名無病何故此滅

復名不動永離一切散動故離諸境界戲論散動故
 名不動何故此滅復名涅槃無相寂滅大安樂住所
 依處故永離一切色等諸想究竟寂滅大安樂住所
 緣境故名為涅槃。

次二十一名釋自通名

復次依滅諦辯無生等名義差別與苦諦相義相違
 故苦諦相者於彼彼處有情類中相續而生為翻彼
 相是故問言何故此滅復名無生離相續生故苦諦
 相者續生已後自身眾分漸次圓滿為翻彼相是故
 問言何故此滅復名無起永離此後漸生起故苦諦

相者宿業煩惱勢力所造為翻彼相是故問言何故
 此滅復名無造永離前際諸業煩惱勢力所引故又
 現在苦是能造作餘有異熟諸業煩惱所依止處為
 翻彼相是故問言何故此滅復名無作不作現在諸
 業煩惱所依處故又苦相者後有異熟相續生起無
 有間斷為翻彼相是故問言何故此滅復名不生永
 離未來相續生故。

後五對苦諦辨名八十三下廣解別名。

復次滅諦有四種相謂滅相靜相妙相離相何故名
 滅相煩惱離繫故謂流轉因煩惱離繫故名滅何故

名靜相苦離繫故行苦所攝不寂靜相取蘊離繫故
 名靜何故名妙相樂淨事故諸煩惱苦究竟離繫自
 然樂淨以為自體故名妙何故名離相常利益事故
 不復退還最極安隱如其次第名常利益安隱利益
 最勝善性是滅諦相。

五十五解四行由滅集諦四愛故緣起下同此第
 三唯樂淨第四唯常初二離繫即義此滅苦集亦
 所顯故彼唯依滅苦無餘所依瑜伽此中間答常
 無常如論瑜伽云問諸行寂滅是滅諦耶設是滅
 諦諸行寂滅耶答若是滅諦亦諸行寂滅有諸行

寂滅非滅諦謂由無常滅故非擇滅故諸行寂滅。
 問若此滅諦先無後有云何是常若常時有何不
 一切有情於一切時般涅槃耶答不流轉相不現
 行相是滅諦相。此諦云何先無後有。又無生相無
 滅相是常相滅諦亦爾。是故名常。若有證得一切
 麤重永息滅者彼般涅槃若未證得者彼不般涅
 槃有滅諦故諸有情類有證得者是故般涅槃是
 證所顯非生所顯。

云何道諦謂由此道故知若斷集證滅修道是略說
 道諦相今於此中依四聖諦以其作用顯道體相。

明道諦中有二。初問。次答。後釋。四行。答中有二。初
 略行相作用顯之後依位顯體。

知苦斷集證滅修道者五十五云。由彼苦諦是四
 顛倒所依處故為除顛倒故徧知苦。既徧知苦今
 徧知集。由彼集諦苦諦攝故。雖徧知苦仍為集諦
 之所隨逐故。須更說永斷集諦。除彼因種苦永無
 故。言觸證者是現見義。由於滅諦現前見故不生
 怖畏愛樂攝受。是故次說觸證滅諦。勤欲觸證若
 勤修道乃能承辦所說三義。是故後說修習道諦。
 此說入道觀諦所因及其所由。集滅彼苦滅唯由

道故證於滅今者顯道諦有此作用也

又道有五種謂資糧道加行道見道修道究竟道如是五種依道自性及眷屬以顯道諦差別。

明五種道為道諦中初列五名後隨別釋。

資糧道者謂諸異生所有尸羅守護根門飲食知量初夜後夜嘗不睡眠勤修止觀正知而住復有所餘進習諸善聞思修所生慧修習此故得成現觀解脫所依器性謂諸異生所有尸羅乃至正知而住等是資糧道體由彼修習淨尸羅等極圓滿故復有所餘進習諸善者謂無悔等由聞思等所生諸慧得成煖

等次第見諦永斷諸障相續堪任性。

此中所說資糧道者謂諸異生所有尸羅守護根門等者。瑜伽二十一聲聞地初說有非菩薩性遇二種緣。一勝。二劣。勝緣者謂正法增上他音及內如理作意。劣緣者謂若自圓滿若善法欲若正出家若戒律儀若根律儀若於食知量若初夜後夜常勤修習覺寤瑜伽若正知而住若樂遠離若清淨諸蓋若依三摩地。自圓滿中有五句。一善得人身。男女。二生於聖處。中國等也。三諸根無缺。不長短。不瘡癩等。四勝處淨信。勝處正法也。淨信於此起。五離諸業。信能除一切煩惱垢故。

障。謂遠及增長。現生不得入聖故。上之五種名自

圓滿。他圓滿者亦有五句。一諸佛出世。二說正法

教。謂四法。三法教久住。佛在及後。正法未隱。四法住隨轉。隨者

以法誠五他所哀愍。起施等心。此上五句名他圓

滿。自他圓滿為緣起善法欲戒根律儀等十句也

一善法欲者既聞正法獲得淨信起厭捨妻子心

形趣於非家勤修正行令得圓滿生如是欲。二正

出家白四羯磨受勤策戒等。三戒律儀出家已堅

牢防護別解脫律儀乃至六支。四根律儀從此尸

羅守護正念修常委念以念防心行平等位眼見

色已而不取相不取隨好恣心漏泄惡不善故等

五食知量不為倡蕩嬌逸節好端嚴食於所食以

正思擇為身安住支持除飢渴攝梵行斷故受令

新受不生為養存力樂無罪安穩而住。六初夜後

夜常勤修習覺寤瑜伽晝日分經行冥坐二種威

儀從順障法淨修其心初夜亦爾過此分已出住

處外洗濯其足右脇而臥重累其足住光明想正

念正知思惟起想後夜分亦爾二種威儀淨修其

心。七正知而住若往止住觀瞻屈申持衣鉢食飲

嗽嘗行住坐臥悟寤之時語默解勞睡時皆正知

住。八樂遠離遠離一切臥具等貪住阿練若樹下
 空室山谷等乃至平野邊際臥具。九清淨諸蓋謂
 於五蓋淨修心已。心離諸蓋安住堅善勝三摩地。
 十依三摩地謂斷蓋已離心隨煩惱惡不善有尋
 伺離生喜樂入初靜慮具足安住。乃至第四靜
 慮具足安住如是漸次修行轉勝以上名為修習
 劣緣從此已後為令聖諦知斷證修便於他音各
 有堪能力發生作意等入諦現觀乃至般涅槃名
 為勝緣。此中不說初善法欲及正出家但說第三
 戒律儀乃至第七正知而住。唯有五句。其此善法

欲及出家雖亦資糧道未是勝位故論略之其樂
 遠離等三是加行道之前方便所以不說或亦是
 資糧道攝。此中具說爾許。次下論云復有所餘進
 修諸善等攝其後三亦無妨難。其此尸羅攝彼出
 家亦得彼白四羯磨等以為出家。此中資糧加行
 道名道諦者六十四云是資糧加行實是道諦世
 尊有處唯說聖道以為道諦據最勝故亦與此同。
 此二道中無漏脫略。見諦聞熏資故以前不資即
 非也。取有漏不為體。

加行道者謂所有資糧皆是加行或有加行非資糧

謂已積集資糧道者所有順決擇分善根謂煖法頂
 法順諦忍法世第一法煖法者謂各別內證於諸諦
 中明得三摩地鉢羅若及彼相應等法由淨定心依
 諦增上契經等法於意言問諸義顯現緣彼所生奢
 摩他毗鉢舍那等是名煖法頂法者謂各別內證於
 諸諦中明增三摩地鉢羅若及彼相應等法由彼頂
 法展轉增進居上位故順諦忍法者謂各別內證於
 諸諦中一分已入隨順三摩地鉢羅若及彼相應等
 法一分已入者於無所取一向忍解故一分隨順者
 於無能取隨順通達所依處故世第一法者謂各別

內證於諸諦中無閒心三摩地鉢羅若及彼相應等
 法從此無閒必起最初出世道故云何見道若總說
 謂世第一法無閒無所得三摩地鉢羅若及彼相應
 等法由無分別奢摩他毗鉢舍那等為體相故。

第二見道有二初問後答答有二初明見道體相
 次明聖道輪後釋經說見道處義初中復二初明
 見道體後明見道真相差別若總說下初出體後
 又所緣能緣等下辨真相差別。

又所緣能緣平等平等智為其相由此通達所取能
 取無性真如故又遣各別有情假法假徧遣二假所

緣法智為相。云何遣各別有情假所緣法智為相。由此智於自相續中不分別我相故。不分別者是除遣義。云何遣各別法假所緣法智為相。由此智於自相續中不分別色等法相故。云何徧遣二假所緣法智為相。由此智於一切處無有差別。不分別我及法相故。

差別真相中有二科。若以一心為正初所緣能緣平等平等智為其相。辨一心真。又遣以下辨三心十六心假。若三心為真。初辨三心等。總是真見道。後十六智等為相。真中初總出體。竟俱以平等智

為相。後顯差別。故說三心。又初如瑜伽說一心事究竟故。據實而言。即有三心。顯揚第十七成現觀品說見道。然三心已下有二段文。一云三心以前真。後明相。然真中三心菩薩。真十六心菩薩。相若依二乘二品為真。但斷人執為二品故。

復次。若別說見道差別。謂世第一法。無閒苦法智。忍苦法智。苦類智。忍苦類智。集法智。忍集法智。集類智。忍集類智。滅法智。忍滅法智。滅類智。忍滅類智。道法智。忍道法智。道類智。忍道類智。如是十六種於諸聖諦中。法類智。忍及法類智。是見道差別相。

明十六心相見道中有二初解相見道後結非實
解相見道中有三初列十六智次別牒解釋後於
此位中由法忍法智等總料簡之。

苦者謂苦諦苦法者謂苦諦增上所起教法法智者
謂於加行道中觀察諦增上法智智忍者謂先觀察
增上力故於各別苦諦中起現證無漏慧由此慧故
永捨見苦所斷一切煩惱今於此中所說義者謂於
方便道中觀察依止苦諦所起契經等法如理作意
所攝智增上力故於自相續苦諦中現證彼真如出
世閒慧正見體生由此慧故永捨一切見苦所斷三

界所繫二十八隨眠是故名爲苦法智忍苦法智者
謂忍無閒由此智故於前所斷煩惱解脫而得作證
所以者何先由忍故永斷一切見苦所斷煩惱令所
依轉從此無閒由如是智生證得轉依是名苦法智
法智中言解脫而得作證者雋師云此寄相說其
證無爲解脫如前一心三心見道二說如前可知
今寄相言以法忍斷惑故以智爲證解脫非真實
理其類忍中此言緣法智諸論有言斷上惑者如
前會釋

苦類智忍者謂苦法智無閒無漏慧生於苦法智忍

及苦法智各別內證言後諸聖法皆是此種類。所以者何。由初二種若忍若智是後一切學與無學聖法種類從此彼得生。故是故無漏慧生各別內證緣。此為境言後諸聖法皆是此種類。是故名為苦類智忍。苦類智者。謂此無閒無漏智生。審定印可苦類智忍。所以者何。由苦類智忍無閒無漏智生於苦類智忍內證印可。故名苦類智。如是於餘諦中隨其所應諸忍諸智盡當知。

別牒解釋中有一。初明苦諦四智後類餘三諦苦類智忍中言後聖法皆是此類者。其修道無學道

中此智如何行相不可言緣後聖法。是此類。此類如後得智前因種類。故名後得。此但緣智為境。初後分成類忍智。何必要須作此解相。或緣同類亦得。但知緣智智今顯智緣如智之類故。

於此位中。由法忍法智覺悟所取。由類忍類智覺悟能取。所以者何。出世間道有二境界。謂真如及正智。法智品道真如為境。類智品道正智為境。由此諸忍智如實了知故。

總料簡文中分三。初釋法類智差別。次釋名無相觀者。後顯十六心刹那總名見道。此十六心是諦

觀行相攝法不盡唯後得智收不說緣餘事智故
又於此一切忍智位中說名安住無相觀者如薄伽
梵說第六無相住補特伽羅者即現住此忍智位中
者是也於此位中一切相皆不可得故。

第二釋名無相觀中分三初論本解名無相觀者
次釋論引經證成後別顯六種無相住於此位中
一切相等者不同緣有漏有十相此無男女等相
又無相住有六種謂空無相無願滅定有頂見道
此中無願等有頂等名無相者無分別差別相非
一切全無。

論云又無相住有六種如文可知如大論五十八
云隨信法行入見道為第六無相行非信勝解見
得身證慧解脫俱解脫五得其名如備師云此從
下向上說為第六非上從下此乃雋師云所未見
文釋云大論約人為論故言隨信法行入見道此
論約法為論直言見道故無相違未聞此中六種
與彼六法不同彼以人此約法故別也彼云俱脫
慧脫身證信解見得隨信法行第六此汎釋六種
無相彼約六行即究竟道二修道三見道一此言
第六無相見道十六心皆是彼言隨信法行者準

下第十三法信行在已具資糧。即在上品決擇分位何故相違。答曰。彼隨信法行人在見道不取隨信。故此不同。問曰。下第十三言隨信法在決擇分位不入果差別何故。彼五十八云。入見道與向說異。即究竟道二。修道三人。見道一人。合隨信法入見道。如毗婆沙云。以行相等故合說。

如是十六心剎那說名見道。所以者何。由如是忍智所攝十六心剎那。於曾所未見四聖諦境。各以四剎那見。故名爲見道。又心剎那者。謂於所知境智生究竟名一剎那。非唯於本無今有生時。名心剎那。何以

故。乃至於所知境能知智生所作究竟名一剎那故。如說苦應徧知是一心剎那。如是集應永斷等亦爾。解十六心剎那是論本文。下說爲四心等是釋論師合爲四。又心剎那進看文勢。總束爲一。準下結中。即一一諦名爲一心緣一諦究竟故。

又如上說見道差別。皆假建立。非真實爾。何以故。出世位中各別內證絕戲論故。

結上段中三心爲真。由諸十六三心爲假徧結三心。

云何見道。依此論及大論五十八有一心見道。及

五十五顯揚十七有三心見道五十八復有九心
 見道此論下文復有十六心見道四心見道何以
 如此不同者西方二說。二云其真見道離戲論唯
 只一心如五十八說其三心等皆假說相見道何
 以名緣非安立諦云何言從世第一法生何用三
 心各皆言斷麤重十六心等復言世第一法生而
 何所因述曰引時證異故說不同其真觀中唯一
 心是但以十九云聖者後得智離欲乃至得有頂
 卽六十九文勢似預流者亦得有頂無漏定何故
 不說得滅定此論唯說離三定下惑得六十九雖

不言得滅定以後得智伏無所有處下惑亦可得
 滅定唯識第七卷二說皆有證約彼初說對法且
 依彼人據實未離初定亦得據彼後說六十九通
 論第三果人非必初果六十九不言不還未離初
 定得滅定爲正唯識論天親攝論說唯識不還不
 退菩薩三乘無學唯此定故故知初菩薩前加行
 先學人觀後學法觀入真觀中雙爲二觀後相見
 道前之二心學前加行第三雙觀放真觀中又卽
 真觀中人法各異麤細不同先學斷麤後方學細
 第三雙放義析真如有異故有三心故菩薩相見

道三心不同。真觀相難知。相觀相易說。義析真觀
 唯說三心。假言斷麤重。故言從第一法生緣。非安
 立諦。又為十六心者。一菩薩相觀亦放前真。前真
 之中分義用異。無閒解脫道皆緣相分生。返照自
 體名自證分。故相見道法忍法智學前二道類忍
 類智學自證分。但緣前心類智。雖緣忍生。可以擬
 學解脫道之自證類忍。準知學無閒道心自證。又
 二乘之人。加行作十六心觀。其入真觀亦唯生空
 一心後相觀中亦放加行。學真觀者已如前說。亦
 以真觀難說。但說相觀之心。假說為真。故言從世

第一法無閒十六心生。或十六心觀。唯二乘相為
 非菩薩作。其言九心者。於中三釋。一說謂四忍智
 品別有八心。忍智合論。故說為四類忍智亦然。復
 依一止說。故有九心。又說法智品有四者。既云品
 言明非一定。此中意取四法忍類忍亦然。合說忍
 數。故有八種。依法類智品復有八心。俱解脫道。故
 依一心說。唯說一心。故合有九。又說法忍智計合
 八心。斷下界惑。故合說為四類忍智品者。亦八
 心。斷上界惑。故合說為四。後重觀前十六心事
 究竟。故依一止說。唯說一心。總名九心。其四心者

此乃分諦而論非觀中為四至文可知其此會釋
 二家同此第二說說三心為真見道者即取彼五
 十五文緣非安立等為證後十六心是假相見道
 三心皆言斷麤重者麤重有多種今說無妨思之
 可知云何五十八言一心文釋曰見道斷惑非如
 修位作九品見斷東煩惱為一品事究竟故總名
 一心亦無妨難諸餘相違一如前說。

如諸論皆云第三是類智此言法智者法類二種
 義有多端一斷緣上一界名類斷緣下界名法如
 言法忍斷下惑類忍斷上惑一緣理名法緣智名

類如十六心依總相說三別觀法名法總觀法名
 類即此相違者是也依此三位思一切法其言一
 心家三心既為相見解脫道即翻前者是或別一
 心緣解脫亦得其三心家皆翻前名解脫思準可
 知唯第三心亦法二釋一別起一心為解脫道亦
 得或即相見中苦法忍是亦得義理無違又或說
 苦法忍斷惑世第一法生等於真觀中義說亦得
 說相見道亦得如前說一心見道家觀心解唯一
 品此中為一刹那為多刹那相續又二說唯一刹
 那又亦多刹那以事究竟故三心家如何問此有

又六十九云法智見道斷欲界惑類智見道斷色
 無色界惑此之會釋如前論無別法智斷上界惑
 但有總言法智為無閒道法智三位如前應知準
 彼釋此應思類解彼論次文問一切類智現在前
 時皆能了別色界無色界耶答若有曾於上界諸
 法善取相者即能了別若不爾者即不能了別諸
 法師多以此文既云曾習類智能了上界明知超
 越依類智斷若不爾者不能了別即云初修行次
 第人以法智斷上界惑此理不然諸論皆無以法
 智斷上界惑文今言分別但以智緣事差別觀會

修彼法以類智緣不曾習人不能了別但遮類智
 能了故言何必法智不曾習人遂緣上界其實法
 智斷三界惑類智但能緣法智生如此論下其言
 類智斷上界者此隨轉文非真實理其人見道依
 幾地如大論六十九彼亦有依身處又唯依初未
 至及四靜慮非餘未至及無色如下釋更有餘文
 同雖有中間無漏不言入見道以遊觀無漏故禿
 王居多散故其依五地皆是那含依未至地唯初
 二果若得初禪依七作意必那含果以斷欲九惑
 故方得究竟其那含超越人等亦爾為一觀斷修

或當別斷。如此道理。至十二卷方解。

復次。一切道諦由四種相應隨覺了。謂安立故思惟。故證受故圓滿故。安立者。謂聲聞等隨自所證已得。究竟為欲令他亦了知。故由後得智以無量種名。句。文身安立道諦。謂於諸諦中有如是如是。忍如是如是。智如是等。思惟者。謂正修習現觀方便。以世閒智。如所安立。思惟數習證受者。謂如是數習已。自內證受。最初見道。正出世閒無戲論位。圓滿者。謂此位後。圓滿轉依。乃至證得究竟。彼既證得究竟位。已復由後得智以名。句。文身安立道諦。如是四相。真實道輪。

數數展轉相依而轉。無有斷絕。

道諦四相。道法輪中。初安立。釋何須相見道。所以重觀真位。擬後說。故乃至無學位。亦爾。四輪中文。有三。初標次說。後結。此意由聲聞等說。次學加行。次證次圓滿。後復說之名輪。

四種道諦中。云聲聞以後得智說法。雋師二說。一。即無漏心說法。若爾。身口之業。亦應無漏。如菩薩以心無漏故。又釋。此後得智種類名。後得智若爾。無漏智中。何故不說。今取後釋。以一乘劣故。無漏智不能說法。又身口有漏。非如菩薩以無漏智說。

身口業亦無漏故。釋經遠塵中分二。初釋三句經。後釋九句經。二句初次即後釋之。

如經言遠塵離垢於諸法中正法眼生者。此依見道說。諸法忍能遠塵。諸法智能離垢。由彼最初於諸諦中妙聖慧眼為自性故。法忍能遠塵者。由諸法忍永斷一切煩惱塵故。法智能離垢者。由諸法智已斷障垢依得生故。又於此忍智兩位如其次第徧知故。永斷故道得清淨。依此而說遠塵離垢。又經言見法得法極通達法究竟堅法。越度一切希望疑惑不假他緣於大師教餘不能引於諸法中得無所畏者。此亦

依見道說於所化有情聖諦現觀無間說故。見法者謂諸法忍由彼通達真實法故得法者謂諸法智彼於轉依能作證故。極通達法者謂諸類忍通達諸聖法。是此一類故。究竟堅法者謂諸類智於諸所知已究竟故。越度一切希望者。由諸忍智出世間道證得長夜所希聖果於自所證無希慮故。越度一切疑惑者於此位中於他所證無有猶豫謂餘亦能證此勝位故。不假他緣者於所修道中雖無他導引自然善巧故。於大師教餘不能引者於佛聖教已得證淨雖轉餘生不為邪道所化引故。於諸法中得無所畏者

於依所證問記法中如惡欲增上慢者怯劣心永無有故。

初中初總後別釋。

引經遠塵離垢等者遠塵謂見道法忍。離垢謂法智。大論八十三忍智通修道彼論文云謂見慢及我慢準義修道有不是明言修道即彼論中彼文亦解不作此言更勘讀未見文。此約勝言見法。大論八十三有二復次說前復次云見法者謂二忍得法謂二智。達法謂見道無閒道堅聖謂解脫道。後復次同此如此引釋并法師別記勘五十三六

十三九十三并無此文疏上亦無此釋。

又於此忍智兩位等者徧知苦斷集或逆次配無閒道斷解脫道知或無閒道知解脫道斷已斷故。

大乘阿毗達磨雜集論述記卷第二十

